



28/02/2025



MES 0 25 0000472573

გადაწყვეტილება

შპს ქართულ-ამერიკული უნივერსიტეტის "ბიზნესის ადმინისტრირების" საბაკალავრო (240 კრედიტი) საგანმანათლებლო პროგრამის აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1. „უმაღლესი განათლების შესახებ“ საქართველოს კანონის 66-ემუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული "უმაღლესი საგანმანათლებლო დაწესებულებების საგანმანათლებლო პროგრამების აკრედიტაციის დებულების“ 27²-ე მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე, იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵-ემუხლის მე-5 პუნქტის თანახმად, საბჭო ვალდებულია, დაასაბუთოს მის მიერ მიღებული გადაწყვეტილება.

1.2 „განათლების ხარისხის განვითარების შესახებ“ საქართველოს კანონის 22-ემუხლის მე-2 პუნქტის „ა“ ქვეპუნქტისა და აკრედიტაციის დებულების 27⁵ - ე მუხლის პირველი პუნქტის „ა“ ქვეპუნქტის შესაბამისად, საბჭო იღებს გადაწყვეტილებას საგანმანათლებლო პროგრამისთვის აკრედიტაციის მინიჭების შესახებ, თუ „უმაღლესი განათლების შესახებ“ საქართველოს კანონის 66-ე მუხლის მე-4 პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის მე-8 პუნქტისა და აკრედიტაციის დებულების 27⁶ - ე მუხლის პირველი პუნქტის „ა“ ქვეპუნქტის შესაბამისად, საგანმანათლებლო პროგრამის პირველი და ყოველი მომდევნო აკრედიტაციის შემთხვევაში, საგანმანათლებლო პროგრამა აკრედიტაციის სტანდარტებთან შესაბამისობის შეფასებისას, ყველა სტანდარტთან მიმართებით საბჭოს მიერ შეფასდა, როგორც „სრულად ან/და მეტწილად შესაბამისობაშია სტანდარტის მოთხოვნებთან“.

1.3 „აკრედიტაციის დებულების“ 27⁵-ე მუხლის მე-3 პუნქტის შესაბამისად, აკრედიტაციის მინიჭების შესახებ გადაწყვეტილების მიღების შემთხვევაში, საბჭო უფლებამოსილია აკრედიტაციის მაძიებელს მისცეს რეკომენდაციები.

1.4 „აკრედიტაციის დებულების“ 27⁶-ე მუხლის პირველი პუნქტის „ბ“ ქვეპუნქტის თანახმად, ერთ სტანდარტთან მიმართებით მაინც შეფასდა, როგორც „მეტწილად შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „ნაწილობრივ შესაბამისობაშია სტანდარტის მოთხოვნებთან ან „არ არის შესაბამისობაში

სტანდარტის მოთხოვნებთან“, საბჭო იღებს გადაწყვეტილებას აკრედიტაციის შესახებ და დაწესებულებას განუსაზღვრავს ვადას მიღებული რეკომენდაციების შესრულების თაობაზე ანგარიშის წარსადგენად, რაც აისახება საბჭოს სხდომის ოქმში.

1.5 აკრედიტაციის დებულების 27⁵ -ე მუხლის მე-7¹ პუნქტის შესაბამისად, საბჭო უფლებამოსილია, დასაბუთებული არგუმენტაციის შემთხვევაში, განსაზღვროს გადაწყვეტილებების ძალაში შესვლის თარიღი.

2. აღწერილობითი ნაწილი და დასაბუთება

2.1. სსიპ - განათლების ხარისხის განვითარების ეროვნული ცენტრის 2024 წლის 04 სექტემბრის №1064041 ბრძანების საფუძველზე შეიქმნა ექსპერტთა ჯგუფი, რომელმაც განახორციელა დაწესებულებაში ვიზიტი "ბიზნესის ადმინისტრირების" საბაკალავრო (240 კრედიტი), "ბიზნესის ადმინისტრირების" ინგლისურენოვანი საბაკალავრო (240 კრედიტი), "ბიზნესის ადმინისტრირების" საბაკალავრო (180 კრედიტი) და "ბიზნესის ადმინისტრირების" ინგლისურენოვანი საბაკალავრო (180 კრედიტი) საგანმანათლებლო პროგრამების შეფასების მიზნით 2024 წლის 30 სექტემბერსა და 1 ოქტომბერს.

2.2. საბჭომ შეისწავლა საგანმანათლებლო პროგრამების აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიცია.

2.3. ზეპირი მოსმენა გაიმართა 2025 წლის 21 თებერვალს. სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიციის, ასევე, სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ ნაწილობრივ გაიზიარა ექსპერტთა დასკვნაში ასახული შეფასება.

კერძოდ, 1.4 ში ამოიღო კლასტერული რეკომენდაცია:

"რეკომენდებულია, მე-5 და მე-7 სწავლის შედეგების მიღწევის უზრუნველსაყოფად, "საფინანსო ინსტიტუტების რისკების მართვის შესავალი" და "ლიდერობის შესავალი" განისაზღვროს პროგრამის სავალდებულო კურსებად".

რეკომენდებულია პრაქტიკული კომპონენტის გაძლიერება კურსში ინტეგრირებული პრაქტიკული აქტივობების სახით. ეს კომპონენტი უნდა განვითარდეს მისი მიზნების, შინაარსისა და სწავლის შედეგების შესაბამისად.

ეს უზრუნველყოფს პროგრამის სწავლის შედეგების განვითარებას, განსაკუთრებით „პასუხისმგებლობისა და ავტონომიურობის“ ნაწილში - გადავიდა რჩევებში;

შემდეგი რეკომენდაცია დაკორექტირდა: "რეკომენდებულია, დაზუსტდეს გარკვეული კურსების წინაპირობები. მაგალითად, ცოდნის და უნარების ლოგიკური პროგრესიის უზრუნველსაყოფად, კურსს "ფინანსური ანალიზი და სესხის სტრუქტურირება" წინაპირობად უნდა განესაზღვროს "კორპორაციული ფინანსების საფუძვლები", "კორპორაციული ფინანსების საფუძვლების" წინაპირობად განისაზღვროს "ბუღალტრული აღრიცხვა". ამ ცვლილებებით, არ შეცვლილა 1-ლი სტანდარტის შეფასება.

3. სარეზოლუციო ნაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-4 პუნქტების, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-8 პუნქტების, აკრედიტაციის დებულების 27² -ე მუხლის პირველი პუნქტის, 27⁵ -ე მუხლის პირველი პუნქტის „ა“ ქვეპუნქტისა და მე-5 პუნქტის, 27⁶ -ე მუხლის პირველი პუნქტის „ბ“ ქვეპუნქტის, „საჯარო სამართლის იურიდიული პირის - განათლების ხარისხის

განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ” სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის №223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად,

გადაწყვეტა:

1. დაკმაყოფილდეს შპს ქართულ-ამერიკული უნივერსიტეტის მიერ წარმოდგენილი სააკრედიტაციო განაცხადი და დანართი №1-ით გათვალისწინებულ "ბიზნესის ადმინისტრირების" საბაკალავრო (240 კრედიტი) საგანმანათლებლო პროგრამას მიენიჭოს აკრედიტაცია 7 წლის ვადით - 2032 წლის 21 თებერვლამდე.
2. ცნობილ იქნას აკრედიტაციის ექსპერტთა ჯგუფის დასკვნა შპს ქართულ-ამერიკული უნივერსიტეტის "ბიზნესის ადმინისტრირების" საბაკალავრო (240 კრედიტი), "ბიზნესის ადმინისტრირების" ინგლისურენოვანი საბაკალავრო (240 კრედიტი), "ბიზნესის ადმინისტრირების" საბაკალავრო (180 კრედიტი) და "ბიზნესის ადმინისტრირების" ინგლისურენოვანი საბაკალავრო (180 კრედიტი) საგანმანათლებლო პროგრამების კლასტერის შესახებ ამ გადაწყვეტილების განუყოფელ ნაწილად (დანართი №2).
3. ცნობილ იქნას საბჭოს 2025 წლის 28 თებერვლის სხდომის №411240 ოქმის № 01 ნაწილი ამ გადაწყვეტილების განუყოფელ ნაწილად (დანართი №3).
4. დაწესებულებას საბჭომ შესასრულებლად განუსაზღვრა შემდეგი რეკომენდაციები და რჩევები:

რეკომენდაციები:

- რეკომენდებულია, პროგრამის სწავლის შედეგების ფორმირებისას გათვალისწინებული იყოს მხოლოდ პროგრამის სავალდებულო კურსები. ამჟამად, აღნიშნულ პროცესში გათვალისწინებულია არჩევითი კურსები, რაც არ შეესაბამება აკრედიტაციის სტანდარტებს.
- რეკომენდებულია, გადაიხედოს სწავლის შედეგების რუკა, ვინაიდან სწავლის შედეგების ლოგიკური პროგრესია (გაცნობა გაღრმავება განმტკიცება) არ არის თანმიმდევრულად წარმოდგენილი. მაგალითად, არსებული რუკის თანახმად, მე-9 სწავლის შედეგი არის გაცნობილი და გაღრმავებული, მაგრამ არ არის განმტკიცებული, ხოლო მე-7 სწავლის შედეგი ჯერ განმტკიცებულია და შემდეგ გაღრმავებული, რაც ალოგიკურია და ა.შ.
- რეკომენდებულია, დაზუსტდეს გარკვეული კურსების წინაპირობები. მაგალითად, ცოდნის და უნარების ლოგიკური პროგრესიის უზრუნველსაყოფად, კურსს "ფინანსური ანალიზი და სესხის სტრუქტურირება" წინაპირობად უნდა განესაზღვროს "კორპორაციული ფინანსების საფუძვლები", "კორპორაციული ფინანსების საფუძვლების" წინაპირობად განისაზღვროს "ბუღალტრული აღრიცხვა";
- რეკომენდებულია, რომ სტაჟირების ობიექტებთან და დამსაქმებლებთან გაფორმებულ მემორანდუმებში გათვალისწინებული იყოს სტუდენტთა რაოდენობა, რათა პროგრამის ყველა სტუდენტს ჰქონდეს საკმარისი პრაქტიკის შესაძლებლობა.
- რეკომენდებულია პროფესიული პრაქტიკის კურსის სტატუსის შეცვლა და მისი განსაზღვრა როგორც სავალდებულო კურსი პრაქტიკული უნარების განვითარების თვალსაზრისით, და ჩაეთვალოთ გავლილად იმ სტუდენტებს რომლებიც დასაქმებულები არიან კვალიფიკაციის მიხედვით;
- რეკომენდებულია, ხარისხის უზრუნველყოფის სამსახურმა "ბიზნესის ადმინისტრირების" საბაკალავრო პროგრამის პერსონალისთვის ჩაატაროს დამატებითი შეხვედრები და ვორქშოფები, რათა გააძლიეროს მათი მონაწილეობა და ჩართულობა ხარისხის უზრუნველყოფის სისტემაში. გარდა ამისა, რეკომენდებულია განხორციელდეს სხვადასხვა გამოკითხვების შედეგად შეგროვებული მონაცემების საფუძვლიანი ანალიზი

და შესაბამის დაინტერესებულ მხარეებთან და მენეჯერებთან განხილვა, იმისათვის, რომ მოხდეს გადაწყვეტილების მიღების პროცესების შესახებ ინფორმაციის მიწოდება და საგანმანათლებლო პროგრამის ხარისხის გაუმჯობესება.

- რეკომენდებულია, სილაბუსში მითითებული სავალდებულო ლიტერატურა ენობრივი კომპეტენციის თვალსაზრისით შეესაბამებოდეს პროგრამის სწავლება - სწავლის რესურსებს. კერძოდ, "ბიზნესის ადმინისტრირების" 240 კრედიტიანი და 180 კრედიტიანი საბაკალავრო პროგრამების პირველ კურსზე, ინგლისურენოვანი ლიტერატურის ნაცვლად უნდა მიეთითოს ქართულენოვანი ლიტერატურა ან უნივერსიტეტის ადმინისტრაციამ და საგნის ლექტორმა უნდა უზრუნველყონ სტუდენტებისთვის ქართულენოვანი რიდერის მომზადება.

რჩევები:

- სასურველია, სამომავლოდ კვლევითი საქმიანობის გაძლიერების და სწავლის შედეგების უკეთ მიღწევის მიზნით, უსდ - მ წახალისოს კლასტერში წარმოდგენილი ოთხივე პროგრამის ბაკალავრიატის სტუდენტები მონაწილეობა მიიღონ კვლევით აქტივობებში (როგორც კონფერენციებში მონაწილეობა) და მეტ სტუდენტს მისცეს სტიმული დაწეროს საბაკალავრო ნაშრომი.
- სასურველია, პროგრამების სწავლის შედეგების სრულად მიღწევის მიზნით, საგანმანათლებლო პროგრამის ხელმძღვანელებმა რეგულარულად შეამოწმონ, მოიცავს თუ არა მოდულების სწავლის შედეგების შეფასებები (როგორც წერით გამოცდებში) მოდულების აღწერილობებში განსაზღვრულ ყველა სწავლის შედეგს.
- სასურველია, უსდ - ს სხვა პროგრამებიდან ან უცხოური უსდ - ს ეკვივალენტური დონის პროგრამიდან არჩევითი კურსებისთვის განკუთვნილი 12 კრედიტი ჩანაცვლდეს სავალდებულო საბაკალავრო ნაშრომით, იმისათვის, რომ უფრო მეტად იყოს უზრუნველყოფილი სტუდენტების კვლევითი, პროფესიული და პრაქტიკული უნარების განვითარება. უსდ-მ ამგვარად უნდა წახალისოს 240 კრედიტიანი პროგრამის ბაკალავრიატის სტუდენტების კვლევითი საქმიანობა, იმისათვის, რომ პირველი კვლევითი გამოცდილება მიიღონ საბაკალავრო საფეხურზე სწავლის პერიოდში და გააგრძელონ აღნიშნული საქმიანობა სამაგისტრო საფეხურზეც.
- სასურველია, გაძლიერდეს თანამშრომლობა კერძო სექტორთან: სტუდენტებისთვის მენტორობის უზრუნველყოფის მიზნით, დარგის ექსპერტების, წარმატებული მეწარმეების და აკადემიური პერსონალის ჩართვა. აღნიშნული ხელმძღვანელობა დაეხმარება სტუდენტებს იდეების საწარმოდ ჩამოყალიბების მთელი პროცესის განმავლობაში, ჩამოყალიბებიდან განხორციელებამდე.
- სასურველია, პროგრამის განვითარება შეფასდეს პარტნიორი უმაღლესი საგანმანათლებლო დაწესებულებების უცხოელი დარგის ექსპერტების მიერ. პროგრამის განვითარებას ასევე ხელს შეუწყობდა უცხოური საგანმანათლებლო პროგრამების ანალოგებთან შედარება.
- სასურველია, უნივერსიტეტმა შეიმუშავოს პროგრამის მონიტორინგის მექანიზმები, სადაც რაოდენობრივი მონაცემები იქნება შინაარსობრივი ანალიზის საფუძვლი, რაც ასევე, უზრუნველყოფს სრულყოფილ თვისებრივ შეფასებებსაც.
- სასურველია, პრაქტიკული კომპონენტის გაძლიერება კურსში ინტეგრირებული პრაქტიკული აქტივობების სახით. ეს კომპონენტი უნდა განვითარდეს მისი მიზნების, შინაარსისა და სწავლის შედეგების შესაბამისად. ეს უზრუნველყოფს პროგრამის სწავლის შედეგების განვითარებას, განსაკუთრებით „პასუხისმგებლობისა და ავტონომიურობის“ ნაწილში.


- მიუხედავად იმისა, ბიზნეს სკოლისთვის გონივრულია პრაქტიკული ორიენტაცია, შესაძლოა გათვალისწინებულ იქნას სამეცნიერო ასპექტების გაძლიერება და 9 ბაკალავრიატის სტუდენტების მომზადება სამომავლო სამაგისტრო ნაშრომისთვის საბაკალავრო ნაშრომის ან მსგავსი სამუშაო დოკუმენტის მომზადების მოთხოვნით.

5. საბჭოს აღნიშნული გადაწყვეტილება ძალაში შევიდეს 2025 წლის 21 თებერვალს;

6. საბჭოს მიერ გაცემული რეკომენდაციების შესრულების შესახებ ანგარიშის წარმოდგენის ვადად განისაზღვროს 1 წელი - 2026 წლის 21 თებერვლამდე.

7. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის მე-2 შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი N64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) დაწესებულების ინფორმირების დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო
მდივანი
ტეფნაძე დავით



საგანმანათლებლო პროგრამების აკრედიტაციის საბჭო
საბჭოს თავმჯდომარე
ლომინაძე თამარ

